

12-August--2026

आकाशवाणी

खबरां विजय बजाज कोला

खास-खास खबरां:-

1. गृहमंत्री अमित शाह अज्ज राज्यसभा च केरल दा नांs बदलने लेई केरलम नांs परिवर्तन बिल 2026 पेश करगंन।
2. प्रधानमंत्री नरेन्द्र मोदी अज्ज नमीं दिल्ली च साबका राष्ट्रपति रामनाथ कोविंद हुंदी आत्मकथा दा विमोचन करडन।
3. उपराष्ट्रपति सी.पी. राधाकृष्णन होरें अज्ज नमीं दिल्ली दे भारत मंडपम थमां “हर घर तिरंगा” रैली गी झंडी दस्सियै रवाना कीता।
4. मौसम विभाग ने अज्ज पूर्वी राजस्थान- मध्य महाराष्ट्र-ओडिशा-झारखंड ते पच्छिम बंगाल च भारी थमां बड़ी भारी बरखा दा ऑरेंज अलर्ट जारी कीता ऐ।
5. ते राष्ट्रमंडल खेड्डे च भारत दे तलवारबाजें सुन्ने दे 2- चांदी दे 3 ते कैह दे 4 तगमे जिते न।

<><><><><>

Parliament Today

केंद्री गृह मंत्री अमित शाह अज्ज राज्यसभा च केरल दा नांs बदलने लेई केरलम (नांs परिवर्तन) विधेयक, 2026 पेश करने आहले न। लोकसभा ने कल इस बिल गी पास करी दिता हा। राज्यसभा च राष्ट्री सहकारी विकास निगम (संशोधन) बिल, 2026 पर बी अज्ज बचार कीते जाने ते इसदे पास होने दी मेद ऐ। दुई बक्खी लोकसभा च अज्ज खान्नें ते खनिजें दे विकास ते विनियमन सरबंधी संशोधन बिल पर बचार ते इस'गी पास करने लेई पेश कीता जाहग। कल बक्ख-बक्ख मुद्दें पर बरोधी धड़े दे हंगामे दे चलदे संसद दे दौनें सदनें दी कार्यवाही च इक बारी फही विघ्न पेआ। लोकसभा ने राष्ट्री सहकारी विकास निगम संशोधन विधेयक, 2026 पास कीता ते राज्यसभा ने न्यासधिकरण सुधार बिल पास कीता ऐ।

<><><><><>

PM -Kovind Autobiography

प्रधानमंत्री नरेन्द्र मोदी अज्ज नमीं दिल्ली च साबका राष्ट्रपति राम नाथ कोविंद हुंदी आत्मकथा 'भारती गणराज्य दी जित: मेरा जीवन, मेरा संघर्ष' दा विमोचन करडन। इस मौके उपपर प्रधानमंत्री इक सभा गी

संबोधित बी करडन। एह आत्मकथा साबका राश्ट्रपति राम नाथ कोविंद हुंदे जीवन दी जातरा दा इक बड़ा व्यक्तिगत ब्यौरा पेश करदी ऐ। एह कताब ओकड़े मुल्लें-कदरें, तजुर्बे ते हालात बारें बी जानकारी दिंदी ऐ जिंने कोविंद हुंदी जातरा ते सार्वजनिक सेवा गी आकार दिता।

<><><><><><>

UP -Temple CEO

अयोध्या च श्री राम जन्मभूमि तीर्थ क्षेत्र ट्रस्ट दे पैहले मुख कार्यकारी अधिकारी दी नियुक्ति लेई इंटरव्यु आहली प्रक्रिया अज्ज संभारदी ऐ। इस औहद्धे लेई तकरीबन 5 जहार 200 आवेदन हासल होए हे, जिंदे चा खीरी चरण दी जांच दे बाद 18 मेदवारें गी चुनेआ गेआ। राम मंदिर परिसर च स्थित तीर्थयात्री सुविधा केंद्र च कल 9 मेदवारें दा इंटरव्यु लैता गेआ ते बाकी दे 9 मेदवारें दा इंटरव्यु अज्ज लैता जाहग। त्र'उ मैम्बरें आहली ताल समिति, इंटरव्यु दी प्रक्रिया पूरी होने दे बाद चुने गेदे मेदवारें दा ब्यौरा ट्रस्ट गी सौंपग। औंदी 2 सितंबर गी होने आहली ट्रस्ट दी बैठका च इस नियुक्ति गी खीरी मंजूरी मिलने दी मेद ऐ। तोआई राम मंदिर थमां दान दी कथित चोरी दे मामले च जेलें च बंद सबनें अट्ठ आरोपियें दी न्यायिक हिरासत 12 दिनें लेई होर बधाई दिती गेई ऐ। बचाऽ पक्ख दे वकील ने आरोपियें खलाफ भ्रष्टाचार दी रोकथाम सरबन्धी कानून दे प्रावधानें गी हटाने लेई इक आवेदन बी दायर कीता ऐ जेहदे पर अज्ज अदालत च सुनवाई होनी ऐ।

<><><><><><>

WB -CM

पच्छिम बंगाल दे मुखमन्त्री शुभेंदु अधिकारी होरें आखेआ ऐ जे राज्य सरकार जबरन धर्म परिवर्तन गी रोकने लेई इक बिल आहनेने दी योजना बना करदी ऐ। बांकुरा च कल पश्चिमांचल उन्नयन परिषद दी बैठक दे बाद संवाददाताएं कन्ने गल्लबात करदे होई मुखमन्त्री होरें आखेआ जे राज्य च तौले गै इक बरोबर नागरिक संहिता लागू कीती जाहग। उनें आखेआ जे इस सरबन्धें च इक बिल दा मसौदा तैयार करी लैता गेदा ऐ।

<><><><><><>

SC- WB SIR

सुप्रीम कोर्ट ने चुनाऽ आयोग गी ट्रिब्यूनल आसेआ हुनै तगर तय कीती गेदी अपीलें दा ब्योरा देने दा निर्देश दिता ऐ, जिनेंगी पच्छिम बंगाल च मतदाता सूचिएं दी बशेशे नजरसानी आहली प्रक्रिया दे दरान हटाए गेदे लोकें दिएं शकैतें दी दिक्खसुन लेई नियुक्त कीता गेआ हा। प्रधान न्याऽधीश सूर्यकांत हुंदी अध्यक्षता वाली बेंच ने कांग्रेस नेता अधीर रंजन चौधरी हुंदी याचिका दा संज्ञान लैता, जेहदे च राज्य च ट्रिब्यूनल दे सामने

मतदाता सूचिएं दी बशेश नजरसारी मतल्लक बकाया पेदे मामलें दे तौले नबेड़े दी मंग कीती गई ही। सुनवाई दे दरान, श्री चौधरी हुं'दे वकील ने ओकड़े लोकें गी सार्वजनिक बंडु प्रणाली दा लाह नेई मिलने दा मुद्दा बी पुट्टेआ, जिंदे नांs इस प्रक्रिया दे दरान हटाई दिते गे हे।



Elephant Day

पर्यावरण, जंगलात ते जलवायु परिवर्तन सरबन्धी केन्द्री राज्य मंत्री कीर्ति वर्धन सिंह होरें अज्ज हाथिएं सरबन्धी कुल संसारी ध्याड़े दे मौके उप्पर आखेआ ऐ जे दुनिया दे तकरीबन 60 फीसद जंगली एशियाई हाथी भारत च रौहदे न, ते एह भारत गी हाथिएं सरबन्धी समृद्ध विरासत दा जीवंत प्रतीक बनांदा ऐ। श्री सिंह होरें सोशल मीडिया दी इक पोस्ट च आखेआ ऐ जे भारत, इस धरतें दे सबनैं शा समृद्ध ते बन्न-सबन्नता कन्नैं भरोचे इलाकें चा इक्क ऐ। उ'नैं दस्सेआ जे देशें दे 14 राज्यें च हाथिएं दे कुल 33 अभ्यारण्य न। श्री सिंह होरें देशवासियें गी हाथिएं दी रक्षा ते संरक्षण लेई इकजुट होने दी गुजारश कीती।



VP-HGT

हर घर तिरंगा अभियान दे तैहत मुख्य भरै च केई सारे कार्यक्रमें दा आयोजन कीता जा'रदा ऐ। उपराष्ट्रपति सी.पी. राधाकृष्णन होरें अज्ज नमीं दिल्ली दे भारत मंडपम थमां “हर घर तिरंगा” बाईक रैली गी झंडी दस्सियें खाना कीता। एहदे शा पैहले जंदे रोज प्रधानमंत्री नरेन्द्र मोदी होरें देशवासियें गी गुजारश कीती ही जे ओह भारत गी विकसित राष्ट्र बनाने दा धेइया करदे होई पूरे सम्मान ते गर्व आहली भावना दे कन्नैं “स्वतंत्रता दिवस” गी मनान। इंस्टाग्राम पर जारी वीडियो स्नेह च श्री मोदी होरें देशवासियें गी गुजारिश कीती जे ओह “हर घर तिरंगा, घर-घर तिरंगा, हर मन तिरंगा” अभियान दे इक हिस्से दे तौर उप्पर हर इक घरै च राष्ट्री झंडी फहराना जकीनी बनान। मोदी होरें “भारत माता दी जै” ते “वंदे मातरम” आहले देशभक्ति भरोचे नारें दे कन्नैं देशवासियें गी शुभकामनां बी दितिआं।



JK-HGT

जम्मू-कश्मीर च अज्ज श्रीनगर दी मशहूर डल झील दे कंडे बुलेवार्ड रोड पर इक बड्डी तिरंगा जातरा कड्डी गई। उपराज्यपाल मनोज सिन्हा होरें इस रैली दी अगुवाई कीती ते एहदे च ज्हारां बद्धे विद्यार्थी, सरकारी कर्मचारी, सुरक्षाकर्मी ते समाज दे बक्ख-बक्ख तबकें दे लोक शामिल होए। प्रतिभागियें तिरंगा झंडी लैहांदे होई

पूरे रस्ते च देशभक्ति दे गीत गाए। रैली दे दरान जम्मू-कश्मीर पुलस बैंड ने राष्ट्रगान ते देशभक्ति आहले होर दुए गीत बी पेश कीते।



CASO Nagrota

जम्मू पुलस नै औंदे “स्वतंत्रता दिवस” दे चलदे सुरक्षा तरीकाकारें तैहत नगरोटा इलाके च घेराबंदी करिए तपाशी अभियान चलाया। एह तपाशी अभियान नगरोटा- जगटी ते पंजग्राई थाहरें पर चलाया गेआ ते एह करीबन 4 घंटे तगर जारी रेआ। इस्सै दौरान सरेयाला ग्रां च कनून बवस्था बनाई रक्खने दे मददेनजर गश्त ते नाके पर जांच आहली कारवाई कीती गई। इस दौरान कुसै बी संदिग्ध गतिविधि दा पता नैई लग्गा ते स्थिति रमानदारी आहली रेई। जम्मू पुलस दा आखना ऐ जे सुरक्षा ते निगरानी गी औंदे “स्वतंत्रता दिवस” दे सरबंध्य च होर बढ़ाया गेआ ऐ।



Weather

मौसम विभाग नै अज्ज पूर्वी राजस्थान- मध्य महाराष्ट्र- ओडिशा- झारखंड ते पच्छिम बंगाल च भारी थमां मती भारी बरखा दा ऑरेंज अलर्ट जारी कीता ऐ। विभाग नै अगले 2-3 दिनें दौरान मुख्य दे उत्तर-पूर्वी हिस्से- सिक्किम- हिमालयी पश्चिमी बंगाल- छत्तीसगढ़- पश्चिमी राजस्थान- गुजरात- कोंकण- गोवा- पंजाब- उत्तराखंड- हिमाचल प्रदेश- जम्मू ते कश्मीर ते अंडमान ते निकोबार द्वीप समूह च मौलाधार बरखा पौने दा अनुमान लाया ऐ। आंध्र प्रदेश- पुदुचेरी- झारखंड- मध्य प्रदेश ते राजस्थान च गरज चमक कन्नै अंझी-झकखड़ झुली सकदा ऐ। इस्सै चाली अरुणाचल प्रदेश- असम- मेघालय- मणिपुर ते उत्तराखंड च शनिवार तगर इय्यै नैई स्थिति बनी रौहने दी मेद ऐ।



Common Wealth Fencing

नाइजीरिया दे लागोस च आयोजित कॉमनवेल्थ तलवारबाजी आहली प्रतियोगिता च भारत नै तगमे जितने दा शानदार सिलसिला जारी रक्खे दा ऐ। करण सिंह ते शेरजिन शांतिमोल नै कल रातीं सीनियर मर्दे दे मुकाबले च भारत आस्तै सुन्ने दा तगमे जितेआ। 7-11 थमां पिच्छड़े मगरा जबरदस्त वापसी करदे होई उ'नें 15-12

कन्नै मुकाबला जितिए सुन्ने दा तगमा अपने नांs कीता। शेरजिन शांतिमोल नै दुई वरीयता हासिल दक्खन अफ्रीका दे खडारी गी 15-16 कन्नै हराइयै अक्वल थाहर हासिल कीती ते सुन्ने दा तगमा हासिल कीता।

सीनियर महिला मुकाबले च भारतीय महिला तलवारबाजें फीह शानदार प्रदर्शन करदे होई त्रै तगमे जिते। तनिष्का खतरी नै सुन्ने दा ते खुशी दाभाडे ने चांदी दा तगमा जितेआ। प्राची लोहान नै कैह दा तमगा हासिल कीता।

<><><><><><>

SEBI Guidelines

भारतीय प्रतिभूति ते विनियमन बोर्ड- SEBI नै शेयर बजारें गी माली नतीजें गी जमा कराने सरबंधी अपनी विनियमनें दे तैहत सूचिबद्ध दौआर साधन आहले नगर-पालिकाएं दी समें-सीमा च छूट दिती ऐ। जारी कीते गेदे नमें नियमें तैहत सूचिबद्ध नगर-पालिकाएं गी हून बिजन ऑडिट आहली पैहली छमाही दे नतीजे 60 दिनें दे अंदर जमा करोआने होडन- जिसले जे पैहले एह समें-सीमा 45 दिन दी ही। सालाना ऑडिट कीते गेदे माली नतीजें ऑडिट रिपोर्ट कन्नै माली बरा खत्म होने दे 90 दिनें दे अंदर जमा कराने होडन। जिसले के पैहले एह समें-सीमा 60 दिन ही।

<><><><><><>

Read by	:	Vijay Bajaj
Stand by	:	Shruti Khajuria
D.E.O.	:	Rajni Devi
Skilled	:	Rajat Paul
Editor	:	Abhilasha Sharma